

Pleister pa Kanser

Ku frekuensia, ora un hende ta kai será, e ta yora, hasi promesa, insistí ku hamas e lo kometé un krimen. Ma kiko ta su motivashon real? E tin duele ku el a kometé e krimen òf pasobra el a wòrdu gará? Su ofensa ta pen'è òf ta e konsekuensia di e ofensa? El a arepintí di bèrdat...esta, bira lomba pa su maldat?

Mayornan tambe tin e dilema. Ta duel e yu ku el a morde su ruman...òf ta e sota ku ta duel e? Hóbennan i adulto ta “hunga komedia” asina bon ku tin bes nos mes no sa nos motivashon.

Diariamente e mésun “komedia” ta hungá mil i un biaha. Ku frekuensia un mandatario, komersiante, sindikalista, dosente, òf kualke suidadano ta lamentá e situashon deplorable ku nos komunidad ta hañ'é aden. Sin duda bo mes a yega di bisa esaki. **Ma kiko ta e motivashon tras di e sklamashonnan ei?** Bo ta yora pa motibu di e KONSEKUENSIANAN ku nos komunidad ta sufri: kriminalidat, embaraso hubenil, droga, korupshon, èts. Of ta duel bo di kurason ku bo a bandoná Dios i loke ta étiko?

Pa ser franko, hopi hende awendia tin e mésun motivashon ku e kriminal i e mucha: **nan ta yora PASOBRA nan ta kosechá loke nan a sembra.** E kosecha marga ta duel nan, pero nan no ke planta un otro simia. Nan ke pa gobièrnu inisiá tur klase di programa pa kombatí e maldishonnan ku nan mes a yuda planta ma nan no ta dispuesto pa kambia nan sistema di bida. Nan ta deseá solamente un pleister pa e kanser.

Pleisternan no por kura kanser. Igualmente e mihó programa di gobièrnu no por sania nos situashon. Pa kura kanser, mester kòrta i koba te na rais, un operashon doloroso.

E problemanan ku nos islanan ta enfrentá ta resultado di bandoná e étika APSOLUTO ku ta EKSIGÍ birtut personal. Pa solushoná nos situashon, si nos ta gusta òf laga di gusta, **nos MESTER bai bek na e Fuente di bèrdat i birtut: Dios.**

Alexander Solzhenitsyn, e historiadó soviético ku a wòrdu enkarselá i deportá, ganadó di e premio Nóbel pa literatura na 1970, den un charla na Londres na aña 1983, a splika pakiko su puebel a pasa den tantu trastorno. “Mas ku mitar siglo pasá, tempu ku mi tabata mucha, mi ta kòrda tende vários hende di edat atvansá duna e siguiente splikashon pa e gran disasternan ku Rusia a eksperensia: ‘Hende a lubidá Dios; ta p’esei tur esaki a sosodé.’ Desde e tempu ei mi a dediká kasi 50 aña studiando historia di nos revolushon; den e proseso mi a lesa shenes di buki, kolektá shenes di testimonio personal, i ya kaba a kontribuí ocho volúmen di mi mes luchando pa deshasí di e ruínanan ku a keda despues di e tormento. Ma si mi a ser pidí awe pa bisa den asina poko palabra ku ta pusibel kiko ta e kousa prinsipal di e revolushon dañino ku a guli mas ku 60 mion di nos hendenan, mi no por bis'é mas korekto ku pa ripití: ‘Hende a lubidá Dios; ta p’esei tur esaki a sosodé.’”

Solzhenitsyn sa bon kiko e ta papia. Lo nos skucha? **KUALKE PUEBEL ku ta lubidá Dios i sigui su mes kamina tempran òf lat lo kosechá e fruta marga di nan desishon!**

Pa basta aña nos a sigui nos propio rumbo...i kos a piorá. Bo por sigui kana den e mésun direkshon, sigui buska solushonnan humano...pleisternan pa kanser. Of bo por hasi e desishon konsiente pa buska Dios, arepintí di bo mal kamina, ahustá bo bida na e instrukshon di Beibel, i siña bo yunan e mésun étika.

Nos tur ta deseá un solushon efektivo, saniamentu sigur. Nos a purba tur klase di kos. Ta tempu pa nos sigui Dios Su preskripshon, ku pa kolmo ta garantisá un KURA pa nos kanser: “*Si Mi pueblo...umiyá nan mes i hasi orashon, i buska Mi kara i bira for di nan mal kamindanan, e ora ei lo Mi tende for di shelu i lo pordoná nan piká i KURA NAN TERA*” (2 Kronikanan 7:14). Tur otro solushon, ta solamente pleister pa kanser.